

Ibitabo byakoresshejwe mu Gatabo k'Iteraniro ry'Umurimo

1-7 UGUSHYINGO

UBUTUNZI BWO MU IJAMBO RY'IMANA | YOSUWA 18-19

**“Yehova yagaragaje ubwenge igihe
yagabanya Igihugu k’isezerano”**

it-1 359 par. 1

Imbibi

Imiryango y’Abisirayeli yagiye ihabwa gakondo bashingiye ku bintu bibiri: ubufindo n’uko umuryango wanganaga. Ubufindo bwagaragazaga aho buri muryango wari gutuzwa, niba ari mu magepfo, mu majyaruguru, iburasirazuba, iburengerazuba, mu bibaya cyangwa mu misozi. Iyo bakoraga ubufindo, umwanzuro bafataga wabaga uturutse kuri Yehova. Ibyo byatumaga hatabaho ishyari n’amakimbirane (Img 16:33). Bityo rero, kuba Yehova ari we wabaga ayo-boye icyo gikorwa, byatumaga buri muryango uhabwa ahantu hahuje n’ubuhanazi Yakobo yavuze agiye gupfa, buboneka mu Ntangiriro 49:1-33.

it-1 1200 par. 1

Umurage

Gakondo. Igihe Yehova yahaga Abisirayeli gakondo, yabwiye Mose imbibi zagombaga kuhahirizwa (Kb 34:1-12; Ys 1:4). Mose ni we wahaye bene Gadi na bene Rubeni n’igice cy’abagize umuryango wa Manase gakondo yabo (Kb 32:33; Ys 14:3). Indi miryango isigaye, Yosuwa na Eleyazari ni bo bayihaye gakondo bakoresheje ubufindo (Ys 14:1, 2). Nk’uko ubuhanazi bwa Yakobo buboneka mu Ntangiriro 49:5, 7 bubivuga, Simeyoni na Lewi ntibahawwe gakondo ukwabo nk’indi miryango. Umugabane wa bene Simeyoni (hakubiyemo n’imidugudu yabo) wari hagati muri gakondo ya bene Yuda (Ys 19:1-9). Naho bene Lewi wahawe imigi 48 yari hirya no hino muri Isirayeli. Yehova yavuze ko yari kuba umugabane w’Abalewi kuko bari bafite inshingano yihariye yo gukora mu

rusengero. Bahabwaga icya cumi ngo kibe igihe-mbo cyabo kubera umurimo bakoraga (Kb 18: 20, 21; 35:6, 7). Nanone Abisirayeli bahabwaga gakondo mu miryango yabo. Uko abagize umuryango bagendaga biyongera, ni ko bagendaga bagabagabana gakondo bahawe.

it-1 359 par. 2

Imbibi

Iyo ubufindo bwamaraga kugaragaza aho buri muryango wari gutuzwa, noneho hakurikiragaho igikorwa cya kabiri ari cyo kureba uko umuryango ungana, kugira ngo bamenye aho imbibi za gakondo yawo zari kugarukira. Bibiliya igira iti: “Muzagabanye icyo gihugu mukoresheje ubufindo, mukurikije imiryango yanyu. Umuryango ufite abantu benshi uzawuhe gakondo nini, ufite bake uwuhe gakondo nto. Aho ubufindo buzerekana ko ari ah’umuryango uyu n’uyu, ni ho uwo muryango uzahabwa” (Kb 33:54). Aho ubufindo bwagaragazaga ko umuryango ugomba gutura ntihahindukaga, ariko uko hagombaga kuba hangana byo byashoboraga guhinduka bitemwe n’uko umuryango ungana. Urugero, igihe babonaga ko aho umuryango wa Yuda wahawwe hari hanini cyane, bafasheho igice bagiha umuryango wa Simeyoni.—Ys 19:9.

Gucukumbura ibintu by’agaciro byo mu Ijambo ry’Imana

it-1 359 par. 5

Imbibi

Bibiliya ivuga ko ubufindo bwagaragaje ko umuryango wa Yuda (Ys 15:1-63), uwa Yo-zefu (Efurayimu) (Ys 16:1-10) hamwe n’igice cy’abagize umuryango wa Manase (Ys 17: 1-13), ari yo yabanje guhabwa aho yari gutura mu burengerazuba bwa Yorodani, kandi bugaragaza imbibi zaho n’imigi bari guhabwa. Uko bigaragara gahunda yo kugabana igihugu yabaye ihagaze, kuko inkambi y’Abisirayeli yimutse ikava i Gilugali ikajya i Shilo (Ys 14:6; 18:1). Nubwo Bibiliya itavuga igihe ibyo

byamaze, Yosuwa yacyashye imiryango irindwi yari isigaye, kuko yazariraga ntikomeze kwigarurira igice cyari gisigaye (Ys 18:2, 3). Hari impamvu zitandukanye zishobora kuba zaratume ye iyo miryango irindwi izarira ntikomeze kwigarurira igihugu. Hari abahanga mu bya Bibiliya batekereza ko byatewe nuko babonye iminyago myinshi kandi bakaba barumvaga mu rugero runaka bafite umutekano, kuko Abanyakanani batari barigeze babagabaho igitero. Indi mpamvu ishobora kuba yarabiteye, ni uko ahantu bari batarigarurira hashobora kuba hari hatuye amahanga akomeye bakaba baratinye kubarwanya (Ys 13:1-7). Nanone bashobora kuba batari bazi uko icyo gice k'Igihugu k'l-sezerano bari basigaje kwigarurira cyanganaga, ugereranyije na ho bari bamaze kwigarurira.

8-14 UGUSHYINGO

UBUTUNZI BWO MU IJAMBO RY'IMANA | YOSUWA 20-22

**"Icyo twakora mu gihe hari
udushinje ibinyoma"**

w06 15/4 5 par. 3

**Ibanga ryo gushyikirana neza
n'uwo mwashakanye**

Kuganira nta cyo abantu bakinganye bishobora gutuma hatabaho ubwumvikane buke. Kera mu mateka y'Abisirayeli, umuryango wa Rubeni, uwa Gadi n'igice cy'uwa Manase babaga mu burasirazuba bw'Uruzi rwa Yorodani, bubatse 'igicaniro cy'ikimenyabose' hafi y'urwo ruzi. Indi miryango yakiriye nabi icyo gikorwa. Abagine imiryango yabaga iburengerazuba batekereje ko abo bavandimwe babo bo hakurya ya Yorodani bari bahindutse abahakanyi, maze bitegura kujya kubarwanya kuko batekerezaga ko bigize ibyigomeke. Ariko mbere yo kubatera, bohereje intumwa zijya kugirana imishyikirano n'imiryango y'iburasirazuba. Mbega ukuntu icyo cyari igikorwa gihuje n'ubwenge! Basanze icyo gicaniro kitari icyo gutambiraho ibitambo n'amaturo

bitemewe n'amategeko. Ahubwo iyo miryango y'iburasirazuba yatinyaga ko indi miryango yazavuga iti "nta mugabane mufite ku Uwiteka." Icyo gicaniro cyari kuzaba igihama kigaragaza ko na bo basengaga Yehova (Yosuwa 22:10-29). Icyo gicaniro bacyise Umuhamya, bitewe n'uko, uko bigaragara, cyari umuhamya ugaragaza ko bemeraga ko Yehova ari l'mana y'ukuri.—Yosuwa 22:34.

w08 15/11 18 par. 5

"Dukurikirane ibintu bihesha amahoro"

Abisirayeli bamwe bashobora kuba barumvaga ko bari bafite gihama y'uko hakozwe igikorwa kibi, kandi ko kubera iyo mpamvu kubatera babatunguye byari gutuma badapfusha ingabo nyinshi. Ariko kandi, aho kugira ngo iyo miryango yo mu burasirazuba bwa Yorodani ikore ibintu ihubutse, yabatumyeho intumwa kugira ngo ziganire n'abavandimwe babo kuri icyo kibazo. Izo ntumwa zarababajije ziti "iki gicumuro mwacumuye ku Mana y'Abisirayeli mwagicumuriye iki, ko muretse kuyoborwa n'Uwiteka?" Mu by'ukuri, iyo miryango yari yubatse icyo gicaniro ntiyari yacumuye rwose. Ariko se, yari kubyitwaramo ite ikimara kumva icyo kirego? Ese yari kubwira nabi abo bayiregaga cyangwa ikanga kuvugana na bo? Iyo miryango yaregwaga yasubije mu bugwaneza igaragaza neza ko mu by'ukuri ibyo yakoze yabitewe n'icyifuzo yari ifite cyo gukorera Yehova. Icyo gisubizo batenze cyatumye imishyikirano bari bafitanye n'l'mana idahungabana kandi gituma hatameneka amaraso. Kuba baraganiriye batuje byatumye ikibazo gikemuka kandi bigarura amahoro.—Yos 22:13-34.

**Gucukumbura ibintu by'agaciro
byo mu Ijambo ry'Imana**

it-1 402 par. 3

Kanani

Nubwo Abanyakanani benshi batarimbutse kandi Abisirayeli ntibashobore kubatsinda, du-

shobora kuvuga ko n'ubundi Yehova yahaye "Isirayeli igihugu cyose yari yararahiye ba sekuruza ko azabaha" kandi ko yabahaye "amahoro impande zose." Nanone dushobora kuvuga ko "nta sezerano na rimwe ritasohoye mu byiza byose Yehova yasezeranyije inzu ya Isirayeli; byose byarasohoye" (Ys 21:43-45). Nubwo hari abanzi b'Abisirayeli bakomeje guturana na bo, barabatinyaga kandi nta kaga bari babateje. Mbere yaho Imana yari yaravuze ko izirukana Abanyakanani "buhoro buhoro" kugira ngo inyamaswa z'inkazi zitororoka zigakwira muri icyo gihugu cyari kuba kitaraturwa cyose (Kv 23:29, 30; Gut 7:22). Nubwo Abanyakanani bari bafite ibikoresho bikomeye bya gisirikare, hakubiyemo amagare y'intambara afite inziga zikwkiyemo ibyuma bityaye cyane, ntitwavuga ko kuba hari uduce tw'icyo gihugu Abisirayeli batigaruriye byatewe n'uko Yehova atasohoje ibantu byose yari yarabasezeranyije (Ys 17:16-18; Abc 4:13). Ahubwo nk'uko Bibiliya ibigaragaza, kuba hari imigi Abisirayeli bateraga bagatsindwa byabaga byatewe n'uko batumviye Yehova.—Kb 14:44, 45; Ys 7:1-12.

15-21 UGUSHYINGO

UBUTUNZI BWO MU IJAMBO RY'IMANA | YOSUWA 23-24

"Inama za nyuma Yosuwa yagiriye Abisirayeli"

it-1 75

Isezerano

Igihe Abisirayeli bageraga i Kanani, mu Gihugu k'Isezerano, ntibari kwitwa abimukira kuko Imana yari yarabahaye uburenganzira busesuye kuri icyo gihugu nk'uko yari yarabisezeranyije ba sekuruza. Nanone Imana yari yarababujiye kugirana isezerano n'abantu b'abapagani bo muri icyo gihugu (Kv 23:31-33; 34:11-16). Abisirayeli bagombaga gukurikiza amategeko y'Imana n'amateka yayo aho kumvira amategeko y'amahanga yari agiye kwirukanwa imbere

yabo (Lw 18:3, 4; 20:22-24). By'umwihariko Imana yari yarababujije gushakana n'abantu bo muri ayo mahanga. Gushakana n'abagore b'abapagani byari gutuma bashyikirana n'abagineze imiryango yabo, bagasenga imana zabo z'ibinyoma kandi bagakurikiza n'imigenzo yabo. Ibyo byari gutuma bagwa mu mutego bakaba abahakanyi.—Gut 7:2-4; Kv 34:16; Ys 23:12, 13.

w07 1/11 26 par. 19-20

Ijambo rya Yehova ntirihera

¹⁹ Mu by'ukuri, dukurijke ibyo twiboneye n'amaso yacu dushobora kuvuga tuti "nta kintu na kimwe cyabuze mu byiza byose Uwiteka Imana yanyu yabasezeranyije, byose byabasohoyeho nta kintu na kimwe muri ibyo cyabuze" (Yosuwa 23:14). Yehova abohora abagaragu be, arabarinda kandi abitaho. Ese hari isezerano nibura rimwe uzi yatanze ntirisohore mu gihe yagennye? Ntashobora kubikora. Ni iby'ubwenge ko twizera Ijambo ry'Imana ryiringirwa.

²⁰ Bite se ku birebana n'ihihe kizaza? Yehova yatubwiye ko abensi muri twe bashobora kwiringira ko bazaba mu isi izahinduka paradizo ihebuje. Bake muri twe bafite ibyiringiro byo kuzategekana na Kristo mu jjuru. Uko ibyiringiro dufite byaba biri kose, dufite impamvu zifatika zituma dukomeza kuba indahemuka nka Yosuwa. Ibyo twiringiye bizasohora ihihe cyabyo nikigera. Icyo gihe tuzasubiza amaso inyuma, turebe ibyo Yehova yasezeranyije byose, maze natwe tuvuge tuti "byose byarasohoye."

Gucukumbura ibantu by'agaciro byo mu Ijambo ry'Imana

w04 1/12 12 par. 1

Iningo z'ingenzi z'ibikubiye mu gitabo cya Yosuwa

24:2—Mbese Tera se wa Aburahamu yasenga ga ibishushanyo? Mu mizo ya mbere Tera ntiyasengaga Yehova Imana. Birashoboka ko yasengaga imana y'ukwezi yitwa Sini, imana yasengwaga n'abantu bensi muri Uri. Dukurijke

inkuru y'Abayahudi, birashoboka ndetse ko Tera yakoraga ibishushanyo bisengwa. Icyakora, igihe Imana yategekaga Aburahamu kuva muri Uri akajya i Harani, yajyanye na Tera.—Intangiriro 11:31.

22-28 UGUSHYINGO

UBUTUNZI BWO MU IJAMBO RY'IMANA | ABACAMANZA 1-3

"Inkuru ishishikaje kandi igaragaza ubutwari"

w04 15/3 31 par. 3

Ehudi yabakuye ku ngoyi
y'uwabakandamizaga

Kuba Ehudi yaragize icyo ageraho ntibyate-we n'ubuhanga bwe cyangwa se ubushobozi buke bw'umwanzi we. Kugira ngo umugambi w'lmana usohozwe ntibiba bishingiye ku bushobozi bw'umuntu. Impamvu y'ibanze yatumye Ehudi agira icyo ageraho, ni uko Imana yari imushiyigikiye mu gihe yasohozaga umugambi wayo udakomwa imbere wo kurokora ubwoko bwayo. Imana yahagurukirije Abisirayeli Ehudi, kandi "uko Uwiteka yabajaha abacamanza yagumanaga n'umucamanza wese."—Abacamanza 2:18; 3:15.

w04 15/3 30 par. 1-3

Ehudi yabakuye ku ngoyi
y'uwabakandamizaga

Ikintu cya mbere Ehudi yagombaga gukora kwari 'ukwicurishiriza inkota' y'amugi abiri, ngufi ku buryo yashoboraga kuyambariraho imyenda ntigaragare. Ashobora kuba yari yitezé ko baza kumusaka. Ubusanzwe, abatwariraga indyo bambaraga inkota yabo ku itako ry'ibumoso, aho bashoboraga guhita bayisohora vuba vuba. Kubera ko Ehudi we yatwariraga imoso, yahishe inkota ye "ku itako ry'isburyo, ayirenza myambaro ye;" aho hantu abarinzi b'umwami ntibari kwihutira kuhasaka. Bityo, abasha 'guha Eguloni umwami w'i Mowabu izo ndabukirano'

ari nta mbogamizi iyo ari yo yose ahuye na yo.
—Abacamanza 3:16, 17.

Uko byagenze bageze mu rugo kwa Eguloni nta cyo Bibiliya ibivugaho. Ahubwo yarivugije gusa iti "[Ehudi] amaze gutanga indabukirano, asezzerera abazizanye" (Abacamanza 3:18). Ehudi amaze guha umwami ikoro, yaherekeje abari bamutwaje abageza kure y'ingoro ya Eguloni ahantu hari umutekano, maze we aragaruka. Kubera iki? Ese ubundi abo bagabo yari yabazaniye kumurinda, kumuherekeza ibwami se cyangwa bari abo kumutwaza gusa ibyo yari ajyanye ibwami? Ese aho ntiyaba yarashatse ko babanza kugera ahantu hari umutekano kugira ngo abone uko asohoza umugambi we? Uko yaba yarabitekereje kose, icyo tuzi ni uko yagize ubutwari bwo kugaruka ibwami wenyine.

"[Ehudi] ageze mu nganzo z'i Gilugali arakimirana, ageze ibwami abwira umwami ati 'Nyagasani, ngufitiye ubutumwa nakubwira twiherereye.'" Uko yashoboye kwinjira akagera imbere ya Eguloni nta cyo Ibyanditswe bibivugaho. Ese abarinzi b'umwami ntibigeze bamukeka amababa? Baba baratekerezaga se ko Umwisirayeli umwe atashoboraga kugira icyo atwara umwami wabo? Ese kuba Ehudi yaragarutse wenyine byaba byaratume bateke-reza ko aje kugambanira bene wabo? Uko byaba biri kose, icyo Ehudi yashakaga ni ukuvugana n'umwami biherereye kandi yabigezeho.
—Abacamanza 3:19.

Gucukumbura ibintu by'agaciro byo mu Ijambo ry'Imana

w05 15/1 24 par. 7

Ingingo z'ingenzi z'ibikubiye
mu gitabo cy'Abacamanza

2:10-12. Tugomba kugira gahunda ihoraho yo kwiga Bibiliya kugira ngo 'tutibagirwa ibyo [Yehova] yatugiriye' (Zaburi 103:2). Ababyeyi bagomba gucengeza mu mitima y'abana babo ukuri ko mu Ijambo ry'Imana.—Gutegeka 6:6-9.

29 UGUSHYINGO–5 UKUBOZA

UBUTUNZI BWO MU IJAMBO RY'IMANA | ABACAMANZA 4-5

“Yehova yakoresheje abagore babiri ku-gira ngo akize ubwoko bwe”

w15 1/8 12 par. 6

‘Narahagurutse kandi ndi umubyeyi muri Isirayeli’

Iyo Abisirayeli bumvaga izina Sisera byonyine, bahitaga bashya ubwoba kuko Abanyakanani bari babi. Ibyo bigaragazwa n'ibikorwa bakoraga byo gutamba abana n'ubusambanyi bwakorerwaga mu rusengero. Byari byifashe bite igihe uwo mujenerali w'Umunyakanani n'ingabo ze bategekaga icyo gihugu? Indirimbo ya Debora igaragaza ko gukora ingendo byasaga n'aho bi-dashoboka kandi ko nta bantu bari bakirangwa mu midugudu (Abacamanza 5:6, 7). Sa n'ureba ukuntu abantu bagendaga bihishahisha mu bishuru no mu misozi, batinya guhinga no kororera mu midugudu itagira inkuta cyangwa kuhaba. Nanone batinyaga kugenda mu mihandaka manywa kugira ngo batagirirwa nabi, abana babo bakanyagwa cyangwa abagore babo bagafatwa ku ngufu.

w15 1/8 13 par. 1

‘Narahagurutse kandi ndi umubyeyi muri Isirayeli’

Ubwo bwoba babumaranye imyaka 20, amaherezo Yehova aza kubona ko abari bagize ubwoko bwe bari biteguye guhinduka. Indirimbo ya Debora na Baraki ibivuga neza igira iti “kugeza aho jyewe Debora nahagurukiye, kugeza aho nahagurukiye ndi umubyeyi muri Isirayeli.” Ntituzi niba Debora wari umugore wa Lapidoti yari yarabyaye cyangwa niba iyo mvugo ari ikigerenyo. Icyo tuzi ni uko Yehova yahaye Debora inshingano yo kurinda Isirayeli mu buryo bwa kibyeyi. Yamutumye ku mucamanza w'intwari

warangwaga n'ukwizera witwaga Baraki, ngo ahaguruke aje kurwanya Sisera.—Abacamanza 4:3, 6, 7; 5:7.

w15 1/8 15 par. 2

‘Narahagurutse kandi ndi umubyeyi muri Isirayeli’

Yayeli yafashe umwanzuro mu buryo bwhuse. Yetetse Sisera aho yaruhukira maze Sisera amusaba ko nihagira umuntu uza amushakisha, amubwira ko adahari. Amaze kuryama yaramworoshe, hanyuma amusabye amazi amuha ikivuguto. Mu kanya gato Sisera yarasinziriye araheza. Yayeli yafashe ibikoresho bibiri, ni ukuvuga urubambo rw'ihema n'inyundo y'igit. Yari agiye gukora igikorwa kitoroshye cyo kuba umuhodzi wa Yehova. Yagiye yomboka maze yegera umutwe wa Sisera. Iyo yibeshya gato akamuhusha, yari kuba agushije ishyano. Ese yatekerezaga ukuntu uwo mugabo yari amaze imyaka ibarirwa muri za mirongo ajujubya ubwoko bw'lmana? Yaba se yaraterekerezaga ku ishema ryo kuba yararwaniriraga Yehova? Nta cyo iyo nkuru ibivugaho. Icyo tuzi gusa ni uko yaje gusohoza umugambi yari afite akica Sisera.

—Abacamanza 4:18-21; 5:24-27.

**Gucukumbura ibintu by'agaciro
byo mu Ijambo ry'lmana**

w05 15/1 25 par. 5

**Ingingo z'ingenzi z'ibikubiye mu gitabo
cy'Abacamanza**

5:20—Ni gute inyenyeri zo ku ijuru zarwaniriye Baraki? Bibiliya ntivuga ko yafashijwe n'abamarayika. Ntinavuga kandi ko yafashijwe n'imibumbe yo mu kirere yaba yaramanyaguritse ikagwa ku isi, iyo abapfumu ba Sisera babonaga ko yasuraga amakuba; cyangwa se ko byaba bisobanura ko indagu z'abapfumu ba Sisera baragurishaga inyenyeri nta cyo zagezeho. Icyakora nta washidikanya ko Imana yafashije Baraki mu buryo runaka.

6-12 UKUBOZA

**UBUTUNZI BWO MU IJAMBO
RY'IMANA | ABACAMANZA 6-7**
“Genda ukoreshe izo mbaraga ufite”

w02 15/2 6-7

**Amahame y’Imana ashobora
kukugirira umumaro**

Umuntu wari ufite imyifatire ikwiriye ku bimwerekereye kandi akaba yaraterekerezaga ku gaciro ke mu buryo buhwitse, ni Gideyoni, umucamanza w’Abaheburayo ba kera. Ntiyashakaga kuba umuyobozi wa Isirayeli. Ariko kandi, igihe Gideyoni yashyirirwagaho gusohoza iyo nshingano, yagaragaje ko atari ayikwiriye. Yasobanuye agira ati “iwacu turi aboroheje mu muryango wa Manase, nkaba ndi umuhererezi mu nzu ya Data bose.”—Abacamanza 6:12-16.

w05 15/7 16 par. 3

“Inkota y’Uwiteka na Gideyoni”

Mbega ukuntu ibyo byatumye Abamidiyani bakangarana! Mu buryo butunguranye, ibibindi 300 byamenaguritse, urusaku rw’amakondera 300 n’akaruru k’abantu 300, byatumye umutuzo bari bafite uyoyoka. Abamidiyani baratatanye bitewe ahanini n’akaruru k’abantu bavugaga bati “inkota y’Uwiteka na Gideyoni,” maze na bo bungamo urusaku ruba rwinshi. Kubera ako kaduruvayo, ntibashoboraga gutandukanya umwanzi n’utari we. Mu gihe Imana yateraga abanzi babo gusogotana, ba basirikare 300 bagumye mu myanya yabo. Inkambi yakwiriye imishwaro, inzira banyuragamo bahunga irafungwa, maze Abisirayeli bakoresha imbaraga zose bakomeza ibikorwa byo guhumba abari basigaye inyuma kugira ngo bakureho burundi akaga Abamidiyani bari bateje. Amaherezo, igihe kirekire Abamidiyani bari bamezze babakandamiza, babica cyari kirangiye.—Abacamanza 7:19-25; 8:10-12, 28.

**Gucukumbura ibintu by’agaciro
byo mu Ijambo ry’Imana**

w05 15/1 26 par. 6

**Ingingo z’ingenzi z’ibikubiye
mu gitabo cy’Abacamanza**

6:25-27. Gideyoni yagize amakenga kugira ngo atarakaza bitari ngombwa abamurwanyaga. Mu gihe tubwiriza ubutumwa bwiza, tugomba kugira amakenga kugira ngo tutagira uwo dukomretsya bitari ngombwa bitewe n’uko tuvuga.

13-19 UKUBOZA

**UBUTUNZI BWO MU IJAMBO
RY'IMANA | ABACAMANZA 8-9**

“Kwicisha bugufi biruta kwiyemera”

w00 15/8 25 par. 3

Ni gute uhosha amakimbirane?

Igihe ibintu byari bigeze aho rukomeye mu ntambara Gideyoni yarwanaga n’Abamidiyani, yatumye ku muryango w’Abefurayimu ngo baze bamufashe. Ariko kandi, urugamba rumaze kurangira Abefurayimu bahindukiranye Gideyoni, maze bamwitotombera barakaye, kubera ko atari yarabatabaje urugamba rugitangira. Inkuru ivuga ko ‘bamutonganyije cyane.’ Gideyoni yarabashubije ati “nakoze iki gihwanye n’ibanyu? Mbese, impumbano z’imizabibu y’Abefurayimu ntizirusha umwengo wose w’Ababiyezeri kuryoha? Kandi abatware b’i Midiyani, Orebu na Zébu, Uwiteka yarababagabije. Mbese mbarushije iki mu byo mwakoze” (Abacamanza 8:1-3)? Binyuriye ku magambo Gideyoni yatoranyije neza, acubya uburakari, yirinze intambara ya kirimbizi yashoboraga kuba yashyamiranya imiryango. Abo mu muryango w’Abefurayimu bashobora kuba bari bafite ikibazo cyo gukekereza ko bafite agaciro cyane kandi bakagira ubwibone. Ariko kandi, ibyo ntibyabujije Gideyoni kwihatira gushakisha umuti mu mahoro. Mbese, dushobora gukora nk’ibyo?

w17.01 20 par. 15

Tugomba kwiyoroshya

¹⁵ Gideyoni yatanze urugero ruhebuje mu birebana no kwiyoroshya. Igihe umumarayika wa Yehova yamubonekeraga ku ncuro ya mbere, Gideyoni yahise amubwira ko ari umuntu woroheje ukomoka mu muryango uciriritse (Abac 6: 15). Gideyoni amaze kwemera inshingano Yehova yari yamuuhaye, yihatiye gusobanukirwa neza icyo yagombaga gukora, kandi asaba Yehova ko amuyobora (Abac 6:36-40). Gideyoni yari umugabo w'intwari ufile imbaraga, ariko yagize amakenga (Abac 6:11, 27). Ntiyigeze yitwaza iyo nshingano ngo yishakire icyubahiro. Ahubwo akimara gukora ibyo Yehova yari yamuuhaye, yahise asubira iwe.—Abac 8:22, 23, 29.

w08 15/2 9 par. 9

Gendera mu nzira za Yehova

⁹ *Kugira ngo tube incuti z'lmana tugomba 'kwicisha bugufi'* (1 Pet 3:8; Zab 138:6). Agaciro ko kwicisha bugufi kagaragarira ku bintu byabaye, bivugwa mu Bacamanza igice cya 9. Yotamu umuhungu wa Gideyoni yaciye umugani agira ati "kera ibiti byari bigiye kwiyimikamo umwami ngo abitegeke." Yavuzemo igiti cy'umwelayo, icy'u-mutini n'icy'umuzabibu. Ibyo biti biggereranya abantu bari bakwiriye kuyobora Abisirayeli bage-nzi babo ariko batashatse gutegeka. Ariko umufatangwe, igiti gikoreshwa gusa mu guvana, kigereranya umwami w'umwibone Abimeleki, umwicanyi wari ushishikajwe no gukandamiza abandi. Nubwo Abimeleki 'yamaze imyaka itatu ari we mutegeka w'Abisirayeli,' yapfuye imburagihe (Abac 9:8-15, 22, 50-54). Mbega ukuntu 'kwicisha bugufi' ari byo byiza cyane!

Gucukumbura ibintu by'agaciro byo mu Ijambo ry'lmana

w05 15/7 16 par. 6

Efodi

Icyakora, kubera ko Gideyoni atari atunganye, si ko buri gihe yakoraga ibintu bihwitse. Bitewe

n'impamvu itaravuzwe, yakoze efodi mu mi-nyago y'intambara ayishyira mu mudugudu we. Inkuru ivuga ko Abisirayeli bose batangiye 'ku-rarikira' iyo efodi. Barayiramya kandi yabereye Gideyoni n'abo mu nzu ye umutego. Icyakora ntitwavuga ko yasengaga ibishushanyo mu buryo bweruye, kuko Ibyanditswe byemeza ko yizeraga Yehova.—Abacamanza 8:27; Abahebu-rayo 11:32-34.

20-26 UKUBOZA

UBUTUNZI BWO MU IJAMBO

RY'IMANA | ABACAMANZA 10-12

"Yefuta yari akuze mu buryo bw'umwuka"

w16.04 7 par. 9

Kuba indahemuka bituma umuntu yemerwa n'lmana

9 Urugero rwa Yozefu rushobora kuba rwarafashije Yefuta. Ashobora kuba yaramenye ukuntu ybabariye bene se nubwo bari barawanze (Intang 37:4; 45:4, 5). Gutekereza kuri urwo rugero bishobora kuba ari byo byatumye akora ibishimisha Yehova. Ibyo bene se ba Yefuta bamukoreye byaramubabaje cyane. Icyakora, yabonaga ko kurwanirira izina rya Yehova n'ubwoko bwe ari byo byari iby'ingenzi cyane kuruta akababaro yari afite (Abac 11:9). Yari yariyemeje kubera Yehova indahemuka. Ibyo byatumye Yehova amuha umugisha, awuha n'Abisirayeli.—Heb 11:32, 33.

w07 15/5 9 par. 3-4

Yefuta yahiguye umuhigo yahigiye Yehova

Yefuta yagerageje kugirana imishyikirano n'Abamoni. Yohereje intumwa ku mwami wabo kugira ngo amenye impamvu Abamoni bashakaga kubatera. Mu gisubizo Abamoni batanzé, baregaga Abisirayeli ko igithe bavaga muri Egiputa bigaruriye akarere k'Abamoni, bityo bakaba barifuzaga kugasubizwa.—Abacamanza 11:12, 13.

Kubera ko Yefuta yari asobanukiwe neza amateka ya Isirayeli, yahise ahakanira Abamoni ababwira ko ibyo atari ukuri. Yababwiye ko igihe Abisirayeli bavaga muri Egiputa batigize bariganya Abamoni, Abamowabu cyangwa Abanyedomu kandi ko ako karere barwaniraga katari ak'Abamoni igihe Isirayeli yavaga muri Egiputa. Icyo gihe kari ak'Abamori, icyakora Imana yahanye umwami wabo Sihoni mu maboko y'Abisirayeli. Byongeye kandi, Abisirayeli bari bamaze imyaka 300 bahatuye. Kuki icyo gihe ari bwo Abamoni bari bahaburanye?—Abacamanza 11:14-22, 26.

w07 15/5 9 par. 5

Yefuta yahiguye umuhigo yahigiye Yehova

Nanone kandi, Yefuta yibanzze kuri nyirabayaza w'ibibazo byose Isirayeli yari ifite: ni nde wabonwaga ko Imana y'ukuri? Yari Yehova cyangwa yari imana zo mu gihugu Isirayeli yari yarigaruriye? Niba Kemoshi yari ifite imbaraga koko, ese ntiyari kuzikoresha kugira ngo ubwoko bwayo butanyagwa igihugu cyabwo? Iyo yari intambara ishyamiranyije gahunda y'ugusenga kw'ikinyoma kwari gushyigikiwe n'Abamoni, n'y'ugusenga k'ukuri. Ku bw'ibyo, Yefuta yatanze umwanzuro uhuje n'ubwenge agira ati "Uwiteka umucamanza abe umucamanza uyu munsi hagati y'Abisirayeli n'Abamoni."—Abacamanza 11:23-27.

Gucukumbura ibintu by'agaciro byo mu Ijambo ry'Imana

it-2 26

Yefuta

Yefuta yari umwana wemewe n'amategeko. Ni byo koko mama wa Yefuta yari "indaya," icyakora ibyo ntibishatse kuvuga ko yavukiye mu buraya cyangwa ko atari umwana wemewe n'amategeko. Mama we *yari* indaya mbere y'uko aba umugore wa kabiri wa Gileyadi, nk'uko na Rahabu na we yari indaya mbere y'uko ashakana na Salumoni (Abc 11:1; Ys 2:1; Mt

1:5). Impamvu igaragaza ko Yefuta yari umwana wemewe n'amategeko, ni uko abavandimwe be bari bahuje se, ari we Gileyadi, bamwirukanye kugira ngo adahabwa umurage (Abc 11:2). Indi mpamvu ibigaragaza ni uko Yefuta yabaye umutware wemewe w'abantu b'i Gileyadi (muri bo hari harimo n'abavandimwe be bahuje se, akaba ari na bo bari bakomeye) (Abc 11:11). Nanone Yefuta yatambiye Imana igitambo mu ihema ry'ibonaniro (Abc 11:30, 31). Ibyo byose ntibyari gushoboka iyo Yefuta aza kuba ari umwana ute-mewe n'amategeko, kuko Amategeko yagiraga ati: "Nta mwana w'ikibyarirano ugomba kuza mu iteraniro rya Yehova. Ndetse kugeza ku gisekuru cya cumi cy'abamukomokaho, ntihazagire uza mu iteraniro rya Yehova."—Gut 23:2.

27 UKUBOZA-2 MUTARAMA

UBUTUNZI BWO MU IJAMBO RY'IMANA | ABACAMANZA 13-14

"Isomo ababyeyi bavana kuri Manowa n'umugore we"

w13 15/8 16 par. 1

Babyeyi—Nimwigishe abana banyu uhereye mu bwana bwabo

Reka turebe urugero rw'umugabo wo mu mur yango w'Abadani witwaga Manowa, wari utuye mu mugi wa Sora, muri Isirayeli ya kera. Umumarayika wa Yehova yabwiye umugore wa Manowa wari ingumba ko yari kuzabyara umuhungu (Abac 13:2, 3). Nta gushidikanya ko ibyo byashimishije cyane Manowa n'umugore we bari abizerwa. Icyakora, bari banafite impunge-nge nyinshi. Ku bw'ibyo, Manowa yarasenze ati "ndakwinginze Yehova, umuntu w'Imana y'ukuri wohereje umureke yongere agaruke, atwigishe uko tuzarerwa uwo mwana uzavuka" (Abac 13:8). Manowa n'umugore we bari bahangayi-kishijwe n'uko bari kuzarerwa uwo mwana wabo. Nta gushidikanya ko bigishije umuhungu wabo Samusoni amategeko y'Imana, kandi uko bigaragara bagize icyo bageraho. Bibiliya igira iti

‘umwuka wa Yehova uza [kuri Samusoni].’ Ibyo byatumye Samusoni akora ibantu byinshi biko-meye igihe yari umucamanza wa Isirayeli.—Abac 13:25; 14:5, 6; 15:14, 15.

w05 15/3 25-26

Samusoni yaneshaga abifashijwemo n’imbaraga za Yehova

Uko Samusoni yagendaga akura, ‘Uwiteka [yakomezaga] kumuha umugisha’ (Abacamanza 13:24). Umunsi umwe Samusoni yasanze se na nyina arababwira ati “nabengutse umukobwa i Timuna wo mu bakobwa b’Abafilisitiya, none mumunsabire” (Abacamanza 14:2). Tekereza ukuntu batunguwe! Aho kugira ngo umuhungu wabo akize Abisirayeli amaboko y’ababakandamizaga, ahubwo yashakaga kubashakamo umugore. Gushyingiranwa n’umugore wasengaga imana z’abapagani byari binyuranyije n’Amategeko y’Imana (Kuva 34:11-16). Ni yo mpamvu ababyeyi be banze bati “mbese nta mugeni uri mu bakobwa ba bene wanyu, cyangwa mu bwoko bwacu bwose, byatuma ujya gushaka umugenmu Bafiletiya batakebwe?” Icyakora, Samusoni yaratsimbaraye ati “nsabira uwo kuko ari we nkunda cyane.”—Abacamanza 14:3.

Gucukumbura ibantu by’agaciro byo mu Ijambo ry’Imana

w05 15/3 26 par. 1

Samusoni yaneshaga abifashijwemo n’imbaraga za Yehova

Ni mu buhe buryo Samusoni ‘yakundaga cyane’ uwo Mufilisityakazi? Hari igitabo cyavuze ko atari uko yari “mwiza cyane, ahubwo ko [Samusoni] yamukundaga kubera ko hari umugambi yari amufiteho” (McClintock and Strong’s Cyclopedias). Uwuhe mugambi? Mu Bacamanza 14:4, hasobanura ko Samusoni “yashakaga impamvu ku Bafiletiya.” Iyo ni yo mpamvu Samusoni yari yarabengutse uwo mugore. Samusoni amaze gukura ‘umwuka w’Uwiteka watangiye kumukoresha’ cyangwa se kumushishikariza kugira

icyo akora (Abacamanza 13:25). Bityo, umwuka wa Yehova ni wo watumye Samusoni asaba mu buryo budasanzwe umugore, kandi ni na wo wamuyoboye mu gihe cyose yamaze ari umucamanza wa Isirayeli. Ese uburyo Samusoni yashakaga yarabubonye? Mbere na mbere, reka turebe ukuntu Yehova yamwijeje ko azamushiyigikira.

